



**Općina Stari Grad Sarajevo
Općinsko vijeće**

**Municipality of Stari Grad Sarajevo
Municipal Council**

Na osnovu člana 13. Zakona o principima lokalne samouprave Federacije Bosne i Hercegovine ("Službene novine FBiH", broj 49/06 i 51/09), člana 25. Statuta Općine Stari Grad Sarajevo – Prečišćeni tekst ("Službene novine Kantona Sarajevo", broj 20/13), Općinsko vijeće Stari Grad Sarajevo je, na sjednici održanoj 28. septembra 2017. godine, usvojilo je

**KODEKS
ETIČKIH PRINCIPA ZA IZABRANE ZVANIČNIKE U
OPĆINI STARI GRAD SARAJEVO**

I – UVODNI DIO

**Član 1.
(Svrha Kodeksa)**

(1) Kodeksom etičkih principa za izabrane zvaničnike Općine Stari Grad Sarajevo (u daljem tekstu: Kodeks) uspostavljaju se standardi ponašanja, zasnovani na Ustavu i zakonima Bosne i Hercegovine, Federacije Bosne i Hercegovine i Kantona Sarajevo, kao i odredbama Statuta, Poslovnika Općinskog vijeća i drugih propisa Općine Stari Grad Sarajevo, kojih se trebaju pridržavati izabrani zvaničnici Općine Stari Grad Sarajevo (u daljem tekstu: Općina) u obavljanju svojih dužnosti.

(2) Ovaj Kodeks sadrži pravila i principe dobrog ponašanja izabranih zvaničnika, prvenstveno prema građanima, međusobne odnose izabranih zvaničnika, odnos prema državnim službenicima, postupanje u slučaju nepoštivanja Kodeksa i nadzor nad njegovim provođenjem.

(3) Svrha Kodeksa je da se njegovim prihvatanjem i dosljednom primjenom uspostavi primjeren nivo korektnog odnosa i kulture dijaloga, osigura objektivnost i profesionalna odgovornost, spriječi bilo kakva diskriminacija u djelovanju i ponašanju izabranih zvaničnika, a u cilju promovisanja ugleda Općine i Općinskog vijeća Stari Grad Sarajevo (u daljem tekstu: Općinsko vijeće) i osnaži povjerenje građana prema institucijama vlasti.

(4) Gramatički izrazi upotrijebljeni u ovom Kodeksu, za označavanje muškog ili ženskog spola, podrazumijevaju oba spola.

II – PRIMJENE KODEKSA

**Član 2.
(Izabrani zvaničnici)**

(1) Odredbe ovog Kodeksa se odnose na izabrane zvaničnike u Općinskom vijeću Stari Grad Sarajevo kojima je mandat povjeren putem neposrednih izbora, odnosno predsjednike i članove radnih tijela (u daljem tekstu: radna tijela) imenovanim od strane Općinskog vijeća.

(2) U smislu odredaba iz tačke e) člana 3. Zakona o sukobu interesa u organima vlasti u Federaciji Bosne i Hercegovine, izabranim zvaničnicima u Općini smatraju se: predsjedavajući Općinskog vijeća, njegovi zamjenici i vijećnici u Općinskom vijeću.

Član 3.
(Radna tijela Općinskog vijeća)

Odredbe ovog Kodeksa dužni su poštivati i predsjednik, zamjenik predsjednika i članovi stalnih radnih tijela koje Općinsko vijeće obrazuje za pripremanje i razmataranje materijala iz svoje nadležnosti koji su u prijedlogu dnevnog reda zakazane sjednice Općinskog vijeća i za stručnu obradu, praćenje i proučavanje drugih pitanja iz nadležnosti Općinskog vijeća.

III – OSNOVNI PRINCIPI PONAŠANJA

Član 4.
(Zakonitost i javni interes)

(1) Davanjem svečane izjave ili imenovanjem, izabrani zvaničnici i radna tijela, svoje dužnosti su obavezni obavljati u skladu sa Ustavom i zakonima Bosne i Hercegovine, Federacije Bosne i Hercegovine i Kantona Sarajevo, kao i Statutom, Poslovníkom i drugim propisima Općine.

(2) Prilikom obavljanja svojih dužnosti, nosioci izvršnih funkcija i radna tijela će raditi u općem interesu i zalagati se za ljudska prava i slobode i ravnopravnost svih naroda i građana koji u njima žive i poštovati odredbe ovog Kodeksa.

Član 5.
(Ciljevi obavljanja dužnosti)

(1) U vršenju povjerene funkcije nosioci izvršnih funkcija i radna tijela će obavljati povjerenu funkciju i dužnost savjesno i odgovorno, uz naglašenu otvorenost i spremnost da odgovaraju za svoje odluke, djelovanja i ponašanja.

(2) Standardi ponašanja ustanovljeni ovim kodeksom trebali bi biti stalna preporuka u javnom djelovanju i nakon isteka mandata, a sve u cilju daljeg jačanja povjerenja javnosti u integritet državnih institucija.

Član 6.
(Krivični i parnični postupak)

(1) Krivični i parnični postupak protiv izabranih zvaničnika i radnih tijela vodi se prema važećem Zakonu o krivičnom i Zakonu o parničnom postupku.

(2) Ukoliko lica iz stava (1) ovog člana počine krivično djelo u obavljanju svoje dužnosti, Općina i Općinsko vijeće će preduzeti mjere da bi se sačuvali tragovi krivičnog djela, predmeti na kojima je ili pomoću kojih je učinjeno krivično djelo odnosno drugi dokazi o njima i obavijestiti će policiju ili tužilaštvo bez odlaganja.

(3) Na način opisan u prethodnom stavu, Općina i Općinsko vijeće će postupiti kada lica iz stava (1) ovog člana, u obavljanju svojih dužnosti, počini prekršaj iz Kantonalnog Zakona o prekršajima protiv javnog reda i mira i Odluke o prekršajima protiv javnog reda i mira koju donosi Općinsko vijeće.

(4) Ukoliko lica iz stava (1) ovog člana izvrše krivično djelo, odnosno prekršaj protiv javnog reda i mira, u okviru ili izvan okvira svojih dužnosti, Općinsko vijeće će, u tom slučaju, u cilju zaštite ugleda Općine kao organa lokalne samouprave, zauzeti svoj stav i o tome informisati organe gonjenja i javnost.

(5) U obavljanju svojih funkcija, izabrani zvaničnici i radna tijela će uvažavati prava i ovlaštenja drugih izabranih predstavnika, suzdržavajući se od podsticanja ili pomaganja u

izvršavanju povjerenih funkcija radi dovođenja u privilegovan položaj sebe ili drugih izabranih zvaničnika.

IV – POSEBNE OBAVEZE

Član 7. (Izborna kampanja)

(1) Vođenje postupka protiv izabranih zvaničnika za kršenje odredaba Izbornog zakona Bosne i Hercegovine, koji je pokrenut kod Centralne izborne komisije Bosne i Hercegovine (u daljem tekstu: Centralna izborna komisija), ne isključuje pravo Općine i Općinskog vijeća da o neprimjerenom ponašanju svojih izabranih zvaničnika, u toku izborne kampanje, koje narušava ugled lokalnih vlasti i vrijeđa ljudsko dostojanstvo drugih izabranih zvaničnika i zaposlenih lica u Općini, Općinskom vijeću i Općinskom pravobranilaštvu, da svoje mišljenje i tim izabranim zvaničnicima izrekne odgovarajuću sankciju.

(2) Neprimjerenom ponašanje podrazumijeva, ali se ne ograničava na: korištenje uvredljivog riječnika i klevete na račun Općine, Općinskog vijeća i Općinskog pravobranilaštva i drugih zaposlenih lica, korištenje nasilja i prijetnji i sl.

Član 8. (Zabrana favorizovanja i sukob interesa)

(1) Izabrani zvaničnici i radna tijela neće zloupotrebljavati svoja ovlaštenja u svrhu vlastitog interesa ili drugih pojedinaca ili grupe koji su njima bliski.

(2) Izabrani zvaničnici i radna tijela ne smiju svoj privatni interes stavljati iznad javnog interesa niti koristiti javnu funkciju za ličnu dobit lica koje je sa njima povezano.

(2) Kada Općinsko vijeće razmatra pitanje u kojem izabrani zvaničnici, radna tijela ili interesno povezana lica imaju privatni interes, objelodanit će to prije rasprave i glasanja, a izabrani zvaničnik koji ima privatni interes neće učestvovati u raspravi i glasanju.

(3) Izabrani zvaničnici i radna tijela će se pridržavati ograničenja istovremenog obavljanja dvije ili više nespojivih dužnosti, a uzdržavaće se drugih zabranjenih aktivnosti predviđenih Zakonom, kao što su npr. primanje ili zahtijevanje poklona, obećavanje zaposlenja, privilegovanje lica radi stranačkog ili drugog opredjeljenja i dr.

(4) Ukoliko izabrani zvaničnik ili član radnog tijela, prekrši odredbe ovog Kodeksa usljed kojih je sklopljen štetan ugovor po Općinu i narušen ugled lokalnih vlasti, Općinsko vijeće je dužno dati svoje mišljenje i izreći odgovarajuću sankciju.

Član 9. (Ponašanje na sjednicama)

(1) Izabrani zvaničnici i radna tijela će poštovati etičke principe i standarde propisane ovim Kodeksom, a koji proizilaze iz opće prihvaćenih standarda parlamentarnog rada.

(2) Izabrani zvaničnici su dužni:

- a) redovno prisustvovati sjednicama Općinskog vijeća;
- b) poštivati zakazano vrijeme sjednice, u slučaju kašnjenja dužni su ulaziti u salu na način da ne ometaju rad sjednice;
- c) izostanak sa sjednice opravdati pismenim dokazom, a u skladu sa odredbama Odluke o naknadama i drugim pravima Općinskih vijećnika i članova radnih tijela ;
- d) da ne ugrožavaju kvorum za odlučivanje napuštanjem sjednice (bar i na kratko), bez velike potrebe, uz prethodno javljanje predsjedavajućem, ali su i u tom slučaju obavezni prisustvovati izjašnjavanju o tekućoj tački dnevnog reda;
- e) da ne prekidaju govornika naročito obraćanjem sa mjesta na kojem sjede;

- f) da, u radu Općinskog vijeća, ne iskazuju pristrasnost prema određenoj političkoj ideologiji, rasi, vjeroispovjesti, naciji, spolu i drugim mogućim predrasudama;
- g) da, u svojim obraćanjima, kao i prilikom donošenja odgovarajućih odluka ne favorizuju treća lica, grupacije i pojedince kao i lične interese;
- h) da, u svojim obraćanjima, ne koriste izraze i riječi koje vrijeđaju ljudsko dostojanstvo i narušavaju ugled Općine i Općinskog vijeća, te potiču na mržnju i nasilje;
- i) da ne razgovaraju međusobno, osim ako je to neophodno, pod uslovom da ne ometaju tok sjednice;
- j) da, u toku sjednice, ne čitaju materijale koji nisu vezani za rad sjednice;
- k) da razgovor izabranih zvaničnika, u hodniku u toku sjednice, ne smije biti toliko glasan da se njime ometa rad sjednice;
- l) da, u toku sjednice, ne stoje ili neprimjereno sjede u sali;
- m) da, prije početaka sjednice, isključe mobilne telefone, odnosno da iste ne koriste u toku sjednice;
- n) da nastoje da prikladno i uredno odjeveni dolaze na sjednice;
- o) da ne konzumiraju hranu u toku sjednice.

(3) Kodeks ponašanja iz stava (2), izuzev odredaba tačke c) dužni su poštivati i predsjednici, zamjenici predsjednika i članovi radnih tijela Općinskog vijeća u radu na sjednicama svojih Komisija.

Član 10.

(1) O redu na sjednici Općinskog vijeća brine se predsjedavajući ili zamjenik predsjedavajućeg, a o redu na sjednici radnog tijela Općinskog vijeća brine se predsjednik radnog tijela ili njegov zamjenik.

(2) Za oblike narušavanja reda iz stava (2) prethodnog člana, predsjedavajući, zamjenik ili vijećnik, odnosno predsjednik radnog tijela, zamjenik ili njen član, može opomenuti izabranog zvaničnika, odnosno člana radnog tijela da njegovo ponašanje ili govor nije u skladu sa ovim Kodeksom.

(3) Ukoliko lice iz prethodnog stava ovog člana nastavi sa neprimjerenim ponašanjem opisanim u članu 11. stav (2) predsjedavajući, zamjenik ili vijećnik, odnosno predsjednik radnog tijela, zamjenik ili njen član, je dužan prijaviti kršenje odredbi ovog Kodeksa Mandatno-etičkoj komisiji Općinskog vijeća u cilju izricanja sankcije.

(4) Ukoliko sjednicu Općinskog vijeća ili radnog tijela ometa državni službenik ili namještenik zaposlen u Općini, Općinskom vijeću ili Općinskom pravobranilaštvu na način opisan u članu 11. predsjedavajući ili zamjenik, odnosno predsjednik radnog tijela ili njegov zamjenik je dužan to lice prijaviti Općinskom načelniku, Stručnoj službi Općinskog vijeća odnosno Općinskom pravobranilaštvu radi pokretanja disciplinskog postupka.

(5) Ukoliko je lice običan građanin, predsjedavajući ili zamjenik, odnosno predsjednik radnog tijela ili zamjenik, će zatražiti pomoć policijskih organa i dati im sve potrebne informacije u cilju pokretanja prekršajnog postupka.

V – ODNOSI PREMA OPĆINSKOJ UPRAVI

Član 11.

(Odnos prema zaposlenima u Općini)

(1) U obavljanju svojih dužnosti, izabrani zvaničnici i radna tijela će uvažavati prava i ovlašćenja državnih službenika i drugih zaposlenika u Općini.

(2) U službenom komuniciranju izabrani zvaničnici i radna tijela će njegovati kulturu dijaloga i lijepe riječi, a izbjegavati konflikte.

(3) Izabrani zvaničnici i radna tijela neće zahtijevati od zaposlenih u Općini da preduzimaju ili da propuste da preuzmu bilo kakve radnje kako bi na taj način sebi ili drugima pribavili direktnu ili indirektnu korist.

(4) Svojim ponašanjem izabrani zvaničnici i radna tijela neće podsticati ni pomagati državne službenike i druge zaposlenike da se u izvršavanju povjerenih funkcija krši ovaj Kodeks.

VI – ODNOSI S MEDIJIMA

Član 12. (Medijski nastup)

(1) U medijskim nastupima izabrani zvaničnici će pružiti sve potrebne informacije vezane za obavljanje njihovih dužnosti, izbjegavajući pritom obmanjivanje i manipulaciju građana.

(2) Prilikom davanja informacija medijima, izabrani zvaničnik može javnost upoznati i o vlastitom stavu u vezi sa nekim aktuelnim problemom.

(3) Izabrani zvaničnici neće medijima davati povjerljive informacije niti informacije koje se odnose na privatni život izabраниh zvaničnika.

(4) Na provokativna novinarska pitanja izabrani zvaničnici će se suzdržavati od odgovora.

VII – ODNOSI PREMA GRAĐANIMA

Član 13. (Djelovanje u korist svih građana)

(1) Izabrani zvaničnici djelovaće isključivo u korist svih građana, uključujući i one koji im nisu povjerali svoj glas.

(2) U službenoj i privatnoj komunikaciji sa građanima izabrani zvaničnici će se strpljivo, pristojno i ljubazno ponašati.

VIII - ŽALBENE PROCEDURE

Član 14. (Nadležnost)

Praćenje i nadziranje poštivanja odredaba ovog Kodeksa vršit će Mandatno-etička komisija Općinskog vijeća.

Član 15. (Podnošenje prijave za kršenje Kodeksa)

(1) Svaki građanin, nosilac izvršne funkcije, izabrani zvaničnik, savjetnik i drugo zaposleno lice u Općini ima pravo i mogućnost podnošenja prijave za sve oblike kršenja odredbi ovog Kodeksa.

(2) Prijave se podnose u pismenom obliku Mandatno-etičkoj komisiji Općinskog vijeća koja je dužna u roku od 30 dana razmatrati prijavu i dati svoje mišljenje, izreći sankciju o čemu obavještava Općinsko vijeće i javnost.

(3) Sankcija se izriče u pisanoj formi uz obrazloženje.

(4) Izrečene sankcije su konačne.

Član 16.

(Lakši oblici kršenja Kodeksa)

Lakšim oblicima kršenja odredaba ovog Kodeksa smatraju se: narušavanje reda na sjednicama Općinskog vijeća i radnih tijela Općinskog vijeća, na način kako je utvrđeno u članu 9. stav (2) tačke b), e) i od h) do n).

Član 17.

(Teži oblici kršenja Kodeksa)

(1) Težim oblicima kršenja odredbi ovog Kodeksa smatraju se:

- a) nepoštivanje odredaba člana 9. stav (2) tačke a), c) , d) i f),
- b) neprimjereno ponašanje u izbornoj kampanji iz člana 7. stav (2) ovog Kodeksa (korištenje uvredljivog rječnika i klevete),
- c) obmanjivanje i manipulacija građana u medijskim nastupima (član 12. stav (1) ovog Kodeksa),
- d) uzvraćanje na provokativna novinarska pitanja na neprimjeren način (član 12. stav (4) ovog Kodeksa),
- e) nestrpljivo, nepristojno i neljubazno ponašanje prema građanima u službenoj i privatnoj komunikaciji (član 13. stav (2) ovog Kodeksa).

Član 18.

(Najteži oblici kršenja Kodeksa)

(1) Najtežim oblicima kršenja odredbi ovog Kodeksa smatraju se:

- a) obavljanje povjerenih dužnosti na način kojim se krše odredbe zakonskih i podzakonskih akata o prekršajima (član 6. stav (3) ovog Kodeksa),
- b) obavljanje povjerenih dužnosti na način da se počini krivično djelo (član 6. stav (2) ovog Kodeksa),
- c) neprimjereno ponašanje u izbornoj kampanji iz člana 7. stav (2) ovog Kodeksa (korištenje nasilja i prijetnji),
- d) neobjelodanjivanje privatnog interesa prilikom razmatranja određenog pitanja na sjednici Općinskog vijeća i glasanje po pitanju u kojem se ima privatni interes (član 8. stav (2) ovog Kodeksa),
- e) zahtjevanje od zaposlenih u Općinskoj upravi da preduzimaju ili da propuste da preduzmu bilo kakve radnje kako bi na taj način sebi ili drugima pribavili direktnu ili indirektnu korist (član 11. stav (3) ovog Kodeksa),
- f) podsticanje i pomaganje državnih službenika i drugih zaposlenika Općine da , u izvršavanju povjerenih funkcija, krše ovaj Kodeks (član 13. stav (4) ovog Kodeksa),
- g) odavanje povjerljivih informacija i informacija koje se odnose na privatni život izabranih zvaničnika (član 12. stav (3) ovog Kodeksa).

Član 19.
(Vrste sankcija)

(1) Za nepoštivanje ovog Kodeksa mogu se izreći sljedeće sankcije:

- a) pismena opomena, za lakše oblike kršenja odredbi ovog Kodeksa;
- b) novčana kazna utvrđena odredbama Odluke o naknadama i drugim pravima Općinskih vijećnika i članova radnih tijela, za teže oblike kršenja odredbi ovog Kodeksa i u slučajevima ako je izricana pismena opomena (za vijećnike Općinskog vijeća i članove radnih tijela);
- d) javna opomena s objavom u sredstvima javnog informisanja, za najteže oblike kršenja Kodeksa i u slučajevima ako je izricana pismena opomena, odnosno ako je izricana novčana kazna.

(2) Prilikom ocjenjivanja težine povrede odredbi ovog Kodeksa Mandatno-etička komisija imat će u vidu posljedice koje su nastupile po ugled Općine, Općinskog vijeća i Općinskog pravobranilaštva, kao i ljudsko dostojanstvo.

IX – ZAVRŠNE ODREDBE

Član 20.
(Izjava o spremnosti)

Izabrani zvaničnici će se upoznati sa sadržajem i principima ovog Kodeksa na čije poštivanje su se obavezali na početku mandata, davanjem i potpisivanjem svečane izjave.


Član 21.

Stupanjem na snagu ovog Kodeksa prestaju da važe odredbe Etičkog kodeksa nosilaca izvršnih funkcija, izabranih zvaničnika i savjetnika u Općini Stari Grad Sarajevo – Prečišćeni tekst ("Službene novine Kantona Sarajevo", broj 3/11).

Član 22.

Ovaj Kodeks stupa na snagu danom objavljivanja na oglasnoj ploči Općine Stari Grad Sarajevo, a naknadno će se objaviti u „Službenim novinama Kantona Sarajevo“ i web stranici Općine Stari Grad Sarajevo.

Broj: 02-49-*490/17*
septembar, 2017. godine
Sarajevo


PREDSJEDAVAJUĆI
OPĆINSKOG VIJEĆA STARI GRAD
SARAJEVO
dr. sci. Jusuf Pušina



**Općina Stari Grad Sarajevo
Općinsko vijeće**

**Municipality of Stari Grad Sarajevo
Municipal Council**

Na osnovu člana 13. stav (2) Zakona o principima lokalne samouprave u Federaciji Bosne i Hercegovine ("Službene novine FBiH", broj 49/06 i 51/09), člana 11. stav (3) i člana 24. Zakona o ravnopravnosti spolova u Bosni i Hercegovini - Prečišćeni tekst („Službeni glasnik BiH”, broj 32/10), člana 4. stav (2) Zakona o zabrani diskriminacije („Službeni glasnik BiH”, broj 59/09), te člana 25. Statuta Općine Stari Grad Sarajevo – Prečišćeni tekst („Službene novine Kantona Sarajevo”, broj 20/13), Općinsko vijeće Stari Grad Sarajevo, na sjednici održanoj 26.04.2018. godine, usvojilo je:

ODLUKA

o izmjenama i dopunama Kodeksa etičkih principa za izabrane zvaničnike u Općini Stari Grad Sarajevo

Član 1.

U Kodeksu etičkih principa za izabrane zvaničnike u Općini Stari Grad Sarajevo ("Službene novine Kantona Sarajevo", broj 41/17, iza člana 10. dodaje se novi član 10a. koji glasi:

“Član 10a.

(Seksualno uznemiravanje)

(1) Seksualno uznemiravanje je svaki neželjeni oblik verbalnog, neverbalnog ili fizičkog ponašanja spolne prirode kojim se želi povrijediti dostojanstvo osobe ili grupe osoba, ili kojim se postiže takav učinak, naročito kad to ponašanje stvara zastrašujuće, neprijateljsko, degradirajuće, ponižavajuće ili uvredljivo okruženje.

(2) Pod neželjenim oblicima verbalnog ponašanja iz stava (1) smatraju se:

- a) upućivanje verbalnih i fizičkih prijedloga seksualne naravi drugoj osobi;
- b) zahtijevanje neželjenog fizičkog kontakta
- c) iznošenje šala ili aluzija koje su spolne prirode, uključujući opaske u vezi spola i seksualne orijentacije;
- d) izrugivanje i ismijavanje na spolnoj osnovi;
- e) pisanje seksualno eksplicitnih ili sugestivnih poruka ili pisama;
- f) neželjeni pozivi na sastanke, flertovanje te zahtijevanje spolnog odnosa ili seksualnih usluga;
- g) širenje glasina seksualne naravi;
- h) prijetnje upućene osobi koja odbija udovoljiti seksualnim ponudama.

(3) Pod neželjenim oblicima neverbalnog ponašanja iz stava (1) smatraju se:

- a) gestikulacije, znakovi i insinucije koje upućuju na imitaciju spolnog odnosa;
- b) izlaganje druge osobe bilo kojem materijalu eksplicitnog, uvredljivog ili uznemirujućeg sadržaja.

(4) Pod neželjenim oblicima fizičkog ponašanja iz stava (1) smatraju se:

- a) neželjeni fizički kontakti te dodiri seksualne naravi;
- b) neželjena invazija ličnog prostora;
- c) fizički nasrtaji i napadi.

(5) Za izabrane zvaničnike neprihvatljivim se smatraju oblici ponašanja, definisani prethodnim stavovima ovog člana, spram drugih izabranih zvaničnika, lica zaposlenih u Općini i drugih lica.

(6) Zabranjeno je preduzimanje mjera spram izabranog zvaničnika koji prijavi seksualno uznemiravanje.”

Član 2.

U članu 14. iza stava (1) dodaje se novi stav (2) koji glasi:

“(2) U praćenje i nadziranje odredaba člana 10a. ovog Kodeksa, pored Mandatno-etičke komisije, uključuje se i Komisija za ravnopravnost spolova, ljudska prava i slobode Općinskog vijeća.”

Član 3.

U članu 18. stav (1) iza tačke g) dodaje se nova tačka h), i) i j) koje glase:

h) seksualno uznemiravanje izabranih zvaničnika, lica zaposlenih u Općini i drugih lica (član 10a. ovog Kodeksa),

i) zabrana favoriziranja (član 8. stav (1) ovog Kodeksa),

j) sukob interesa, te ostale zakonom zabranjene aktivnosti (član 8. stav (4) ovog Kodeksa).

Član 4.

Ova Odluka stupa na snagu osmi dan od dana objavljivanja u “Službenim novinama Kantona Sarajevo”.



**PREDSJEDAVAJUĆI
OPĆINSKOG VIJEĆA STARI GRAD
SARAJEVO**

dr sci. Jusuf Pušina

Broj:02-49-182/18
April, 2018. godine